

欽  
定  
全  
唐  
文

欽定全唐文卷二百三十九目錄

武三思

賀老人星見表

大周封祀壇碑

并序

大周無上孝明高皇后碑銘

并序

毛傑

與盧藏用書

賀蘭敏之

僧道拜君親議

張易之

秋日宴石淙序

薛曜

服乳石號性論

欽定全唐文卷二百三十九

武三思

三思士彥孫以后族累轉右衛將軍武后臨朝進夏官尚書封梁王證聖元年同鳳閣鸞臺三品神龍初進拜司空同中書門下三品固辭隨例降封靜德郡王尋拜左散騎常侍桓彥範等旣誅二張薛季昶劉幽求勸并誅三思不從翌日三思因韋后潛入宮中反易國政彥範等皆斥去悉復武后法忌節愍太子謀廢之太子懼發羽林兵圍其第殺之旣死中宗爲舉哀贈太尉復封梁王諡曰宣睿宗

立斲棺暴尸夷其墓

賀老人星見表

臣守節等文武官九品以上四千八百四十一人上言臣聞惟德動天必有非常之應惟神感貺允屬會昌之期天鑒孔明降休徵者所以宣天意神聰無昧効嘉祉者所以贊神功故黃鳥白麟載稱姬漢之日元圭黑玉式昭禹湯之代伏惟天冊金輪聖神皇帝陛下潤色丕業光赫寶祚執大象而御風雲鼓洪鑪而運寒燠浹四海輝華六幽希代符來超今邁昔浪委波屬故合沓而無窮日臻月見

尚殷勤而未已伏見太史奏稱八月十九日夜有老人星  
見臣等謹按黃帝占云老人星一名壽星色黃明見則人  
主壽昌又按孫氏瑞應圖云王者承天則老人星臨其國  
又春秋分候懸象文曜鏡云王者安靜則老人星見當以  
秋分候之懸象著符于上人事發明于下壽昌者知億載  
之有歸安靜者示萬邦之必附澄霞助月非唯石氏之占  
散翼垂芒何獨斗樞之說臣等謬參纓笏叨目禎祥慶抃  
之忱寔倍殊品無任踴躍之至

大周封祀壇碑

并序

臣聞乾坤大象也張三光而列五岳帝皇大寶也朝萬國而禮百神然則厯考河圖傍稽洛誡乘樞建極

闕三十地一字

義農軒項氏往堯舜禹湯氏作邦畿則千八百國封禪則

七十二君唯臨日觀之岫纔越天齊之嶺

闕三十三花玉二字

樹遙分神女之臺五方金芝下秀仙人之窟仰通上帝之

境俯枕中樞之甸風烟萬載徵薦鰈而

闕三十

昌之日可一字

以召玉帛可以勒銀繩建顯號而施尊名飛英聲而騰茂

實其唯我大周乎祖

闕三十字

興王之祕籙運鵬海而首出躍

龍泉而高視卷舒元氣分寶位於元宮登步大階受珍圖

於黃屋均兩曜而

闕三字

天冊金輪聖神皇帝陛下徇齊作

后聰明爲辟心懸萬月從鴈塔而乘時足馭千花自龍宮

而應運垂大

闕三十  
一字

位祥龜負字懸符啟夏之徵瑞馬呈

圖豫送開虞之兆豈獨天浮紫氣知赤帝之將興地映紅

闕一  
字

表朱宣之

闕三  
十字

之因葉聚祥經誰識去來之果延妙

相於丹展降法身於紫極湛然常樂輪風銷八柱之天寂

爾園明劍雨

闕三  
十字

踊懸石鏡於丹霄聖水潛開湛珠泉於

碧漢澄漪寫月非關竹箭之流迴岫排雲何止蓮花之一

闕

字

遐循

闕三十  
二字

至德掩於百代宏猷超於萬葉謳歌纂錄



考符瑞於堯終獄訟膺期送休徵於舜禪八牕四達之制

五室九

闕三十字

宮非待子輿之議懸寶思而不測運靈襟而

獨遠雕楹峻峙若鼇柱之臨空反宇中垂似鵬雲之映

闕三

十二

紆席於雞津開紫壇於龜浦蒼龍曉闕鈎陳迴雙闕

之前翠鳳晨張玉輦下三川之上山分虎據指曰

闕三十二字

之野開玉帷而鈐士命金壇而拜將營分水月烟消彭蠡

之濱陳起山虹霧廓洞庭之野三監縱慝七國

闕三十一字雲

梯驅鴻裝而驂鳳駕未若浪井常沸雲漿鎮涌流珠罕匹

練玉難儔偶西聖而爲尊配東皇而保祚

闕三十一字

奏飛龍

遠叶高陽之代鬼神無以祕其奧造化所以同其節鯤池

象浦纔居侯甸之中細柳蟠桃未出王畿

闕三字

庭而失所

銅掌著於漢日金莖營於魏代空竭神仙之望無階風化

之美未有殊方送款爭馳就日之心

闕三字

崒嶢而上秀

山光拂迴疑覆鼎之黃雲珠影浮空似臨圭之白日銅舟

鐵軌凌幽駕險石弩玉環馳烟驛

闕三十

鹿銀麋年趨於

帝園龍編列壤遙通落鴈之峯象郡疏疆遠控跼鶩之水

時驚蛇豕之暴或縱豺狼之虐

闕十字

眘俗皇威遠舉取八

桂若摧枯廟略冥通殄三珠如拉朽烟塵息而九區靜文

軌同而萬方泰至若

闕三十  
一字

至鷺啼草秀鴈飛木落丹花

翠柳送宇宙之春光玉露金風漲山川之秋氣披繡闥而

闕一  
字

天步敞雕軒而

闕三十  
一字

庾登而俗阜高天降祚先開

雨粟之禎厚地鍾祥更錫歸禾之瑞艾韞知懼草纓無犯

鄭竹所以焚科燕

闕三十  
一字

集黑玉來而殷業泰龍飛白水

赤伏至於劉亭鳳集岐山丹書下於姬戶今皇圖纂于七

寶天冊

闕一  
字

於

闕三十  
一字

頭燕頤既巢於阿閣牛尾狼題方

馴於禁籞山車澤馬湊仙掖而駢闐丹甑黃銀擁神州而

駱驛祥冀候

闕三十  
一字

曠時殊貺咸不召而自來絕代洪禎

固無幽而不出于是三靈聳聽萬方翹首羣公陳禪草之

儀天子

闕三十  
一字

者霧集叫龍圍者雨驟宸儀迴映俄流黃

道之暉仙渙遙垂忽降丹穹之液粵以天冊萬歲二年元

闕三十  
一字

三界有昭蘇之樂皇恩與和氣同泛帝澤共祥雲

俱灑車書正朔極遠而窮幽文物聲明振天而動地

闕三十  
十字

之樓法駕出銅駝之道八神分衛飛蒙茸而走陸梁萬騎

齊驅擁浮雲而騰轉電虹霓作其旌旆霜雪爲其

闕三十  
十字帷

宮飲野笙鏞交太一之壇帳殿歎山鐘鼓沸天中之邑聖

皇乃端瑞珽降雕輿率百辟而虔肅契

闕三十  
一字

祥光下燭

金花孕彩依輦道而分暉玉醴浮甘委行廚而蓄潤變溫

景於黑陸降仙禽於丹嶠木呈連理之

闕三十字

射牛之盛禮

鏤皇猷於翠礧騰帝徽於紫岳烟雲動色標絕跡於千年

雷雨流恩洽殊私於萬類

闕三十

一字 牋而頌德抽兔毫而瀝

思所冀皇猷永固將九地而齊貞帝祚長隆與三天而共

遠其詞曰

洪鑪開闢大象初甄四溟環地八柱承天江河潰薄日月

迴旋三微遞往五運更遷

其一

文物旣敘皇王有作

闕三十字

奕

三皇俱陳玉帛各起壇場鳥魚符瑞茅黍徵祥寧臨太室

空陟神房

其

三玉冊延祚金輪馭極壇躍

闕三十字

中千花聳塔

七寶

闕一字

宮傍周法界上達虛空長懸佛日永息魔風

其五

峻極于天鬱盤于地漢蹕徒擁虞巡莫

闕三十字

疊跡蒼龍希

陪

闕一字

輦願侍雲封蒲輪欲馭芝誥俄從

其七

鳳歷祥年龜

圖考日法駕將備乘輿廼出却

闕三十一字

璋旌旗焰焰宮徵

鏘鏘天浮瑞日地燭神光

其九

古樹三花仙巖萬歲銀繩是

勒金

闕三字

業

闕一字 九皇功超

闕下

大周無上孝明高皇后碑銘

并序

臣聞二儀合德中黃承太紫之庭兩曜齊明玉兔儷金烏

之象是以九霄高映星躔乘婺女之精十野旁羅嫺水叶

娥皇之德亦有西陵美族

闕二字

軒帝之宮南土嘉媒入娉

夏王之幄其後太任端一即創文基太姒勤勞還開武運  
故知皇三事業咸資坤載之功帝五風謠必藉陰靈之化  
無上孝明高皇后宏農仙掌人出自有周蓋唐叔虞之後  
也原夫赤烏流火丹雀銜書初開夢梓之祥旋茂翦桐之  
葉自唐郊徙邑晉野裁封即胙土而爲家啟禎符而得姓  
周則志爲大將承九伐之餘資秦則款爲上卿居七城之  
重任豈直十人丹轂金莒舄奕于都畿四代白環玉緒蟬

聯于海縣子雲博識吐鳳摛詞伯起高材銜鱸襲祉誕聖  
不墜降靈相屬神基與紫嶽爭高仙派共黃河俱遠所以  
代隆鍾鼎地積衣冠五公則異代相傳八子則殊年間出  
詳諸國史可畧而言曾祖諱定後魏都督厯新興太原二  
郡太守并州刺史晉昌穆侯宏材卓犖峻局深沈丹山有  
像日之彩綠地見遺風之步褰帷按俗風行馭竹之郊露  
冕臨人化偃焚林之阜豈直鄧攸罷郡深歎雞鳴劉寵辭  
官方憂犬吠祖諱紹後魏征西將軍金紫光祿大夫兼通  
直散騎常侍驃騎大將軍周開府儀同三司封儻城郡公



卿函燕三州刺史贈使持節大將軍成文扶鄧洮五州諸  
軍事成州刺史諡曰信聲飛漸陸響逸鳴臯器重南金材  
橫東箭謀深八陣勇冠三軍旣隆投石之勲果踐銜珠之  
秩加以金龜結紐銅虎分符轉扇揚風停車待兩童兒結  
要無欺一日之期親友論刑自得二天之詠父鄭恭王諱  
達周內史中大夫隋開府儀同三司黃門內史吏部刑部  
二侍郎尚書左右丞趙鄴二州刺史工部吏部二尚書納  
言營東都大監將作大匠武衛將軍左光祿大夫遂寧恭  
公贈吏部尚書唐贈尚書左僕射垂拱二年封鄭王食邑

一萬戶依舊謚曰恭即司徒雍州牧觀德王之季弟也量  
包江海氣逸烟霄文即呂氏春秋武則孫吳兵法箕裘代  
襲鏘鏘萬石之君禮樂基身翼翼千金之子鸞迴玉扎鴈  
落瑯弓激水張鱗遙浮渤海搏風理翰直上扶搖累踐崇  
階頻昇顯秩腰鞬北闕位總貔貅曳履南宮聲高鵷鷺貂  
冠入侍氣應連珠隼旆分班榮參執玉加以累仁鍾祉積  
德延祥四履開封寵及九泉之路千乘

闕一字

禮恩覃萬古

之前棠棣相輝鵲鴿交映劉家兩驥譽滿寰中荀氏八龍  
名高海內通門向術冠蓋成陰甲第當衢歌鐘就列伏惟

無上孝明高皇后資靈月魄毓粹星宮承茂祉于瑤筐降  
仙儀于金屋聲馳丕歲潛流夢日之詳譽表笄年暗積捫  
天之貺蘭襟散馥蕙問揚翹懿則重于邦家柔儀冠于今  
昔忠圖孝範援翠竹而凌霜媛德嬪容引青松而冒雪禮  
枝含秀藻七誠于情田行葉分芳籠九師于性府徽猷內  
湛韶姿外發懸明鏡于積水之間振青飈于長松之下貞  
規漢遠亮節秋高翠縵紅纁從來未理龍梭鳳杼本自多  
輕簡素鄙顰繡之工靜默尚韋編之道明詩習禮豈唯秋  
菊之銘閭史披圖寧止春椒之頌學標天縱開道德之清

關業契生知入文章之妙境曾于方寸具寫千言總遊霧  
于毫端窮偃波于筆杪芝英雲氣入魏帳而分輝龍爪魚  
形映張池而散彩嘗題一簡密記貞心置以緘滕藏之屋  
壁云當使惡無聞于九族善有布于四方指此立身期之  
必遂後因修宅匠者得之恭王見而嘆曰此隆家之女矣  
昔者書堂欲壞惟聞絲竹之音劍匣將開空覩蛟龍之氣  
未有仁心暗徹睿德冥通橫宇宙而無違滿乾坤而自應  
若乃行該地義孝極天經親枕席而忘疲候晨昏而靡倦  
及乎風枝不靜露蓼含哀履厚地而無追仰曾穹而莫報

思欲託三乘之妙果憑五演之元宗永奉嚴親長棲雅志  
昔隋季喪亂海內沸騰伏鼉垂天風塵暗起羣龍戰野旗  
鼓潛張白騎于是爭驅青犢由之競擾蚩尤則餐沙食石  
項羽則索鐵申鉤赤眉探盆子之籌黃巾聚天師之米夫  
三才合契惟神膺大寶之名六位乘時惟聖運洪鑪之德  
唐高祖神堯皇帝材雄鵠起業峻龍飛用丹扆而寧人將  
朱旗而撥亂天網旣紐竟收龍鳳之圖地角咸清遂翦豺  
狼之毒無上孝明高皇帝觀時有作應運而生先知赤伏  
之言預識黃星之兆功深坐樹績茂披榛負伊鼎而陳謀

入張帷而建策龍鈐獨運當赤地之三千獸節長驅偶皇  
天之百六息崑山之巨燎並藉中權定滄海之橫流咸資  
上畧志同魚水契若鹽梅如魏武之得荀攸似漢光之逢  
鄧禹雖英圖盛烈昭鶴鼎于高門而閭則嬪風闕魚軒于  
中饋高祖神堯皇帝位膺元首任切股肱利涉大川寄隆  
舟楫式崇勲舊爲結潘楊酬功草昧之時賞効雲雷之日  
高后以孝誠純至雅操虛沖拒縉禮于移天誓開襟于初  
地六塵不染孤標水上之花四諦方披獨晤星中之月洎  
乎鳳凰開繇獨堅匪席之心烏鵲成橋果迫如綸之命于

是使桂陽公主爲婚主禮娉所須並令官給旣而三星叶  
兆百兩邀歡與松蘿而比茂諧琴瑟而流響風閨少女襲  
蘭蕙而馳芬月幌仙娥韻珩璜而動步光生綺殿比桃李  
而增鮮影發春樓視雲霞而掩色八紘欽其雅躅四海挹  
其鴻徽猶羽翼之宗鸞鳳風雲之隨龍虎者矣廟見斯畢  
即拜應國夫人從班例也于時帝圖肇建王業初基三戶  
亡秦覺風塵之始定四門闢舜識雷雨之將調天無鬪日  
之妖地息崩山之禍主上方勤庶政屬想羣黎將貽共理  
之憂式廣求賢之務無上孝明高皇帝以勲兼竹帛義重

金蘭備歷文武昭昇內外三踐八元之位四臨九伯之途  
中臺飛署劍之榮南服總班條之任高后以業光圖史道  
洽壘篋欲啟仁明實資陰助是以量如江海令未發而風  
移化穆荆衡澤將流而人悅呼鷹臺下尚隔去思抵鵲巖  
前始歌來晚俄而高祖晏駕瞻脫屣而無留太祖崩號奉  
遺弓而積慕沈縣遽軫終無就日之期痼疾遄淹忽切乘  
星之釁高后哀深杞堞誓切柏舟悲一劍之先沈怨雙桐  
之半死昔時寶鏡愴對孤鸞舊日瑤琴悲聞獨雀銜冤負  
痛撫總帳而增號弔影傷魂踐嬭閨而凝慕方祈淨業敬



託良緣憑慧炬于幽途艤慈舟于覺海于是心持寶偈手  
寫金言字落貫花詞分半月龍藏豈及象負難勝將佛日  
而長懸共慈燈而不滅及龍旌首次蜃紉遵途永惟憑附  
之誠願託邱榛之側方冀鵲棲梓樹近接埏庭鶴舞松枝  
傍依隧路特以聖上年居膝下愛切掌中理藉劬勞方資  
顧復宣和諭善屢積葭灰日就月將頻移柘火至永徽六  
年聖上母儀萬國正位六宮將開鍊石之基乃遂積沙之  
祉大帝以西京命賞平原之秩未宏東漢崇恩新野之封  
猶褊于是廣流元霈大啟黃扉稽石窳之遺塵裂寶符之

氣昂即以其年十一月冊拜代國夫人食湯沐邑一千戶  
品正第一位在王公母妻之上魚軒水驚鵬輕影于龍池  
翬服霞明下鮮文於鳳腋榮由德被位匪恩昇驟應嘉名  
徒昭洪澤以顯慶五年十月轉拜榮國夫人尋改封鄮國  
夫人自家疎槐里門荷椒庭累沐殊輝頻膺茂典南鄰夜  
靜奏鐘磬于高臺北里晨通列笙竽于廣榭門有躡珠之  
客家豐饌玉之廚恒處逸而思勞每將昇而必降綠墀青  
瑣特忿王根火布金池深非梁冀謙撝之美萬國仰而知  
勤端潔之風九圍欽而取則智周寰宇識洞古今思所以

匡國庇人濟時揆物嘉謨讜說屢發于神襟厚利豐功頻彰于帝念奏便削藁人莫能知每以孔光祕言合爲臣之道山濤密啟得事君之要可久可大置黔首于生成惟幾惟深頓蒼元于覆載至若緣情體物屬事比辭取之以義方先之以風化清詞海富縟藻雲繁凡所著述皆成典訓其動也方其靜也直其恩也若春雨之流津其威也若秋霜之應節接上以禮逮下以仁君子感其德小人懷其惠天機獨轉靈臺迴燭虛鑒與日月齊明神理共陰陽比奧洋洋乎不可得而稱也旣而離宮霧闢遙橫地乳之山別

館星開上戴天眉之宿甘泉避暑方陪萬乘之遊景福追  
涼更扈六龍之駕不謂災纏霧露疢積膏肓丹展凝慈召  
名醫而接軫紫霄流渥下珍藥而相望玉釜徒煎竟乏長  
生之術金丹莫就終無駐壽之期咸亨元年八月二日崩  
于九成宮之山第春秋九十有二聖上以身齊霄極禮闕  
晨昏戀隔九重望長筵而下泣心馳五起瞻厚褥而銜悲  
大帝慮不勝哀祕慈凶問苴筵欲對仍流不次之恩藁服  
將臨更下非常之澤仍改封衛國夫人以諭聖上之憂懸  
也后疾將大漸時落高春雅志無昏神情不撓影隨燈滅

自此長辭魂逐香銷終無斲返以爲合葬非古禮貴從宜  
將追罔極之慈願在先塋之側聖上奉遵遺旨無忝徽音  
割同穴之芳規就循陔之懿躅卽以其年庚午閏九月辛  
丑朔廿一日辛酉遷座于雍州咸陽縣之洪瀆原鄭恭王  
舊塋之左禮也爾其郊原垓北林薄阡眠秦地關河迴接  
寶雞之野漢家墳壠平依金狄之川松檟森沈何年烏仕  
風烟蕭索幾代人亡于是凝恨九天廢朝三日空山露泣  
痛結飛行曠野雲愁悲纏草樹乃下制贈魯國太夫人諡  
曰忠烈仍令司刑太常伯盧承慶攝同文正卿充監護大

使右肅機皇甫公義等爲副賜東園祕器每事官供務從  
優厚仍令西臺侍郎道國公戴至德持節弔祭京官文武  
九品以上及諸親命婦並赴宅弔哭仍送至渭橋葬事並  
依王禮給班劍四十人羽葆鼓吹儀仗送至墓所往還官  
爲立碑親紆御札聖上因心轉切錫類方宏希申莫大之  
懷冀展飾終之請烏墳欲列恩增茅土之儀鶴隴將崇願  
廣山河之誓遂得五雲飛彩墜仙液于松塋十日迴光被  
增輝于蒿里乃下制贈太原郡王妃餘並如故所司備禮  
冊命大帝親御橫門開軒悲哭紫宸哀痛黃屋淒涼天地

爲之寢光烟雲由其輟色聖上以幽明永隔屺岵長辭終  
無再見之因鎮結千秋之恨奔曦已遠薦霜堇而無年逝  
水難追饋冰魚而未日又以嚴規早墜遠卜厝于鄉墳慈  
蔭重傾近陪親于京隴陵塋眇隔長懸兩地之悲關塞遙  
分每切百身之痛遂命大使備法物自昊陵迎魂歸于順  
陵焉遊冠遠降墜舄遙遷方移沛邑之魂更啟橋山之域  
白雲朝起乍伴龍輶明月宵懸時低蜚衛文明元年聖上  
臨朝其年九月追尊先妃曰魏王妃食邑一萬戶寔封加  
滿五千戶改咸陽園寢曰順義陵大名天啟奧壤星分古

樹梢雲近對黑龍之水荒墳映月傍鄰丹鳳之城徽號旣  
崇園陵載廣屬以圖書河洛龜負鳳銜窗闥方圓雲攢霧  
矯合宮重屋旣布政而嚴禋玉輦金輿且巡河而拜洛永  
昌元年追尊先妣曰忠孝太后旣而謳歌允集獄訟知歸  
天垂革命之符地涌受終之錄元珪錫禹還逢揖讓之年  
黑玉歸商即啟休明之運九莖仙草依漢殿而抽芳五色  
祥雲繞軒宮而布彩下從人望上應天心乘寶位于通三  
建瑤圖于得一黃琮蒼璧祀地郊天複廟重檐宗文祖武  
鴻名肇創光鳳闥于幽泉茂禮將加飾鸞闈于長夜天授



元年追尊曰孝明高皇后陵曰順陵復以祥分貝葉瑞演  
龍花金容開十地之圖玉相告三空之識龍軒黯黯俄爲  
兜率之天鳳闕岌岌忽似須彌之座金輪旣轉玉鏡方懸  
式詮無上之文載顯崇親之義長壽二年后位之上又加  
無上二字尋又下制改順陵曰望鳳臺東京故事西漢遺  
塵封樹空存追崇未廣豈若宸襟鎮結長懷露序之哀睿  
念恒纏永結霜旻之慕遙瞻鳳野式建嘉名遠望鶉郊長  
懸美稱且夫功成翼贊尚畫雲臺勩擅勲庸猶題麟閣況  
乎倪天茂德貫月殊禎垂母則於寰區導嬪風于邦國豈

可使炎涼暗積陵谷潛移惟栽舞鶴之松不刻盤龍之石  
聖上凝懷萬化長想千齡恐地軸之西迴懼天關之北轉  
方圖琬玉式降絲綸永嗟仙鶴之歌用固靈龜之卜微臣  
攀輝日樹沐潤星潢榮忝綠車職兼青史奉先追遠恒積  
慕于丹誠相質披文忽承恩于紫誥是用恭抽弱思敬述  
洪猷屑瓦徒勤生金媿妙揮毫奪魄陳萬一而寧窮伏紙  
驚魂辭再三而不獲逡巡拜首乃作詞云

邈矣上古悠哉厥初天迴紫府地轉黃輿陰陽蕩薄日月  
居諸靈龜負識寶鳳銜書

其一

六位旣陳三才乃立帝皇鬱

起后妃更襲蛟電遙凝虹星下入渭涘疏派塗山是葺

其二

明明高后奕奕輝光白環代鬱丹轂家昌靈基嶽峻曾派

河長捫天集祉裕後開祥

其三

爰自生育早彰尊貴月出星

流青龍翠氣金屋是貯玉衣方萃燕卵非奇雞珠寧異

其四

芝蘭吐葉桃李開花黃雲白氣夜月朝霞賢明自負仁孝

無加曾霄降葯祕篋飛沙

其五

聰悟天資惠才神與河漢靈

匹瀟湘帝女筆動驚迴絃調鶴儻滌想金地

闕字

心寶聚

其六仙容婉婉艷質裁裁星妃恥出月媛羞過椒花入頌柳

絮繁歌詞峯秀嶽學海馳波

其七

魴鯉成詩鳳凰開兆琴瑟

既合室家斯紹兩鶴齊飛雙龍並繞德行方肅言容是昭

其九圍母則六合嬪風恩流海內化被區中銀環曉上金

佩夜中祥開梓闕位冠椒宮其九習禮明詩披圖閱史漢朝

馬鄧周年任姒陰化肆宣坤儀載理貫月騰瑞驚雷送祉

其十高春忽墜上壽俄騫金丹不熟玉釜徒煎黃泉九地

白日三天六宮恨積萬國哀纏其十一寂寞邱隴淒涼原隰

畢地難追終天靡及薤露晨清秋霜降急伏紙銜悲揮毫

灑泣怨聖賢之同盡感昏明之遞襲紀盛德于豐碑冀神

猷兮永立其十二

毛傑

傑一名欽又號雲夢子荊州長林縣人

與盧藏用書

月日雲夢子毛傑謹致書于盧公足下傑聞君所貴者道也所好者才也故才高則披襟而論翰墨道狎則言事而致談笑何必雞鳴狗盜始資僥倖之能簞食瓢飲不顧清虛之用自公立名休代博物多能帝曰爾諧擢爲近侍所以從容禁省出入瑣闥忠弼在躬優柔薦及傑時在草莽運厄窮愁思折俎而無因嗟掃門而不逮豈知羣邪遘逆

聯聲嗷嗷紫奪我朱遠詣惡土賴公神色自若心行不逾  
餌芝朮以養閑坐烟篁而收思傑梁鴻遠旅閔仲未歸留  
連德音徘徊失路互鄉童子當願接於宣尼蘇門先生竟  
未言於阮籍公於傑者如彼僕於公者若此百年朝夕何  
事惜於交遊四海兄弟何必輕於行路賈生不云乎達人  
大觀物無不可小智自私賤彼貴我況公披衣高尚習靜  
閑局世事都捐尤精道意豈有自私而已無大觀者哉倘  
能憐雲獎無知慙張良小子說鴻濛之偈遺黃石之書虛  
往實歸霑霧露之微潤裒多益寡落邱山之一毫則知足

下之眷深焉小人之慶畢矣

賀蘭敏之

敏之武后姊韓國夫人子也武后既誅惟良懷運乃以敏之爲其父士護嗣累拜左侍極蘭臺太史襲爵周國公改姓武氏敏之挾愛佻橫多過失后暴其惡流雷州中道以馬韁自縊死

僧道拜君親議

竊以犧皇至頤金人靡兆於龜文軒后韞靈紫氣未敷於鳥迹汨劉莊精感託神想於東流尹喜翹誠覩物色於西

邁由是龍宮梵化灑慈潤於大千澹泊凝真沖寂宏於寓

內雖復遠標天構氣淑無爲體均具相功深濟度莫不稟

宸極以存其法

事如端尹  
府議中彈

資遺體以受其靈豈有超俗塗

而輕法主潔其已而忽所生忠孝一虧二教何寄今若資

忠貞以凝道移孝行而修誠則福足以顯元門忠孝用光

臣子假或恭敬被於羣品據理尚有可通況唯拜伏君親

未審於何不可

事如祕閣  
局議中彈

請準明詔致拜爲允謹議

張易之

易之左僕射行成族子幼以門廕累遷尚乘奉御武后臨



朝爲司衛少卿聖歷二年置控鶴府以易之爲監尋加麟臺監封恒國公武后臥疾長生院易之引支黨謀爲不軌左臺御史中丞宋璟請按攝當斬后不許神龍元年張柬之崔元暉率羽林兵入迎仙院誅之

秋日宴石淙序

夫瀛洲渤海瞻地際而無窮崑邱閩風望天涯而不極豈

若陽城石淙山水名區觀其峯

闕二字

豎巖粵環繞青翠掩

日韜霞闢銀榜於叢嶽敞瑤臺於洞谷懸崖削壁自然風雨之鄉複澗迴潭卽是雷霆之府則知陰陽同功而穿鑿

獨此標竒造化僂力而雕鐫居然孤絕平臨襄野童兒牧  
馬之場斜瞰茨山野老休牛之地可以兮登踐可以兮棲  
遲羣公松竹其心芝蘭其性罄忠而事明主投分而接神  
交雖迹混市朝而心遊江海或班超燕頷榮封萬里之侯  
或叔夜龍章聲振五鈞之鍛或十居外一居內季成子而  
佐文侯或筆則筆削則削魯孔某而刊大易或涕唾流沫  
濕蔡生之欽頤或颯灑鬚眉舉羊公之折臂或長安鬻鐵  
而位掌兵機或文昌握蘭而榮分星署亦有銀床貴寵爲  
座上之顏回亦有金穴懿親作關西之孔子是知烏有鳳

而魚有鯢翥垂天之羽毛聳橫波之鱗甲並汾水扈游之  
暇柏梁侍奉之餘披霧覩天恩逢樂廣彈琴命酌願值劉  
伶大開文酒之娛都會琳瑯之客將辭繁雜適莽蒼而邀  
歡已造虛無陟崢嶸而抒意於是臨月觀俯雲扃丹壑萬  
重青溪四合騰猿把臂倒掛松枝遊鱗鼓鰓下吹蓮葉文  
狸赤豹窟穴於嵒亭貝闕龍堂沈淪於水府攀窅蒙之倒  
景旣如登紫陽兮入洞天觀瀾汗之洪濤又似駕黿梁兮  
浮碧海樵蘇不爨高談衆妙之門蘿薜成衣遠得幽棲之  
致爰有堯年許仲武來此練魂漢代劉君安遊茲服食目

不私視口不私言日誦仙

闕一字

夜披真訣平身七過含咒

闕一字而

符叩齒三通設靈壇而禹步傍祛俗累卻坐

仙嵒相顧而言曰鍾鼎不可以久食囂塵不可以久

闕一字

蘭薰而摧玉貞則折故仲尼抗浮海之說孟軻養浩然之

氣名利所在似刻舟而訪寶劍禮義何施若擊鼓而求亡

子富貴者勞筋苦骨風火日夜而煎熬文章者傷神潰心

蠢蠢朝昏而嗜嚙豈不見金樓要

闕一字

永出樊籠玉釜靈

膏長排促景三千年之瓊實緩緩充飢五百歲之銅人時

時拍背常樅開口對老聃而不言鴻濛掉頭仰雲將而拊

髀北遊汗漫與若士而摩肩東戲蓬萊共麻姑而扼腕我輩仰之而杌隤望之而盪靈曠若發蒙牖然意下於時青要戒序朱明謝時紅飈息而涼蟬吟白日下而殘虹歇秋風稍起撼羣木於高邱夏日旋移落長繩於暮景天開雲散流離爛漫少室巔今嵩高半遶澗連崗吐焰生光紅綠阿兮紫翠房面林壑而神清閬烟霞而技癢落札則書成鳥跡映科斗之文章染翰則思縈魚牋射驪龍之光彩聚東山之瓊寶未足爲珍擁南澗之風烟纔堪入賞乃戛瑟導意抗音高歌炎暑隔而泉石心寒勸酬舉而鷓鴣耳熱

瀑下淙奔兮雲和樂流波之作管絃丹崑青壁兮地屏風  
藤葛之爲鉤鈕耳目所接天下之爲奇也遊踐所經天下  
之爲絕也吸精英而咀根莖旣四序之無厭腦翰墨而髓  
風烟須一言之有作

薛曜

曜中書令元超子尚城陽公主聖厯中附張易之與修三  
教珠英官正諫大夫

服乳石號性論

夫金石之性堅剛而急烈又性清淨而惡滓穢凡服乳石

訖即須以意消息尋檢舊法不可無備忌也但人性或冷或熱或寬或急皆須量性將衛不可輕有犯觸凡乳石一服之後常在腸胃若人氣力衰石氣強即發動若人氣力盛石氣安即強健謹按古法皆令五十以上始服乳石殊謂不然今驗所見年少服者得力速兼無病患何以言者年少筋力滿盛飲食飽飫彌益精明壯健終無發理年歲遲暮氣候衰竭食飲失宜此石氣勝人無不發動歷觀得失莫過於此夫人年少縱不喫飲食血氣自強年老力微縱肉精細猶不可健以此言之足明古法疎矣凡人身血

脈經行不絕如血脈微有滯處便於其處發瘡或發熱神  
氣昏悶必欲防之每朝及暮溫一兩盞清酒或可以生薑  
刮碎和少茱萸飲之令遍體熱薰薰又作熱羹粥飲之使  
腸胃通利即石氣流行其初服石一二百日尤宜作此將  
息是古法服石不取夏月只取冬月所以然者石有發動  
與服時皆背此又殊乖通論今驗服石飲食失時勞役過  
度立即發動豈待背時今歷見將衛得宜並不發動復見  
名醫平章服石之人常作熱將息儻發調適乃易耳脫若  
石氣發動暫須宣洩服少冷藥便得轉瀉若得通暢熱氣



併除若常作冷將息脫若石氣發動用冷藥無由得轉此  
一曲之說今古存之但欲廣聞見爾其將息皆須自量本  
性冷熱爲候務取安穩不可拘執古論捨已從人庶通幽  
君子以此爲意也按本草石鍾乳味甘溫無毒主欬逆上  
氣明目益精安五藏通百節利九竅下乳汁益氣補虛損  
療腳弱疼冷下焦傷竭強陰久服延年益壽好顏色不老  
令人有子不鍊食之令人淋一名公乳一名蘆石一名夏  
石生少室山谷及太山採無時蛇牀子爲之使惡牡丹元  
石牡蒙畏紫石蓑草少室猶連嵩山也今第一出始興而

江陵及東境名山石洞亦皆有之唯通中輕薄如鵝翎管碎之如爪甲中無鴈齒光明者爲善長挺乃有一二尺者黃色以苦酒洗刷則白仙經用之少俗法所重亦甚貴之謹按鍾乳第一始興其次廣連澧朗柳等州者雖厚而光潤可愛餌之並佳今硤州清溪房州三澗出者亞於始興自餘非其土地不可輕服多發淋渴只可擣篩白練裹之合諸草藥酒浸服之耳陶云鍾乳一二尺者謬說也

欽定全唐文卷二百四十目錄

宋之問一

太平公主山池賦

秋蓮賦

有序

爲楊許州讓右羽林將軍表

爲皇甫懷州讓官表

爲田歸道讓殿中監表

爲梁王武三思妃讓封表

爲定王武攸暨請降王位表

第二表

爲東都僧等請留駕表

爲洛下諸僧請法事迎秀禪師表

爲文武百寮等請造神武頌碑表

爲長安馬明府亡母請邑號狀

在桂州與修史學士吳兢書

欽定全唐文卷二百四十

宋之問

之問字延清一名少連號州宏農人武后朝與楊炯分直  
內教授洛州參軍累轉尚方監丞左奉宸內供奉坐諂附  
張易之兄弟左遷隴州參軍未幾逃還匿洛陽人張仲之  
家仲之與駙馬都尉王同皎謀殺武三思之問發其事起  
爲鴻臚主簿景龍中再轉考功員外郎中宗增置修文館  
學士之問首膺其選尋轉越州長史睿宗立以舊附張武  
配徙欽州先天中賜死

太平公主山池賦

粵若公主誕生皇家太平徵郡國以選號叶時雍之美名  
孕靈娥之秀彩輝嫫女之淳精虹美電熠蘭香玉清稟金  
后之元訓係列聖之聰明厭綺羅與絲竹愛瑤池及赤城  
構仙山兮既畢倖造化之神術其爲狀也攢怪石而岑崟  
其爲異也含清氣而蕭瑟列海岸而爭聳分水亭而對出  
其東則峯崖刻劃洞穴縈迴乍若風飄雨灑兮移鬱島又  
似波沈浪息兮見蓬萊圖萬重于積石匿千嶺于天台荆  
門揭起兮壁峻少室叢生兮劍開削成秀絕蓮華之覆高

掌獨立窈窕神女之戲陽臺爾其樵溪釣浦茅堂菌閣祕  
仙洞之瑤膏隱山家之場藿煙岑水涯繚繞逶迤翠蓮瑤  
草的爍紛披映江潯而爛爛浮海上而纍纍廼之罟與衡  
霍豈吾人之所爲向背重複參差反覆翳蒼蒙龍含青吐  
紅陽崖奪錦陰壑生風竒樹抱石新花灌叢向若天長地  
久兮苔蘚合古往今來兮林澗空始燕秦而開徑訪靈藥  
乎其中其西則翠屏靳巖山路詰曲高閣翔雲丹巖吐綠  
惚兮恍涉弱水兮至崑崙杳兮冥乘龍梁兮向巴蜀壯岷  
嶓兮連屬鬱氛氲兮斷續巖虛兮谷峻藏清兮蓄韻含珠

兮蘊玉衆彩兮明潤芳園暮兮白日沈爽氣浮兮黛壑深  
風泉活活兮鳴石葛藟青青兮蔓岑羅八方之奇獸聚六  
合之珍禽別有複道三襲平臺四注跨渚兮交林蒸雲兮  
起霧駕騫水兮鳳凰樓文虹橋兮彩鷁舟山池成兮帝子  
遊試一望兮消人憂召七賢集五侯棹浦曲席巖幽鳴玉  
佩兮登降列金觴兮獻酬未窮觀而極覽忽雲散而風流  
於是乎上客旣旋重局嚴閉榜童儼而齊發綵女分而爲  
衛牽水葉兮張水嬉摘山花兮詠山圻燕姬荆艷兮代所  
稀鳳舞鸞歌兮儼欲飛披煙弄月兮宵未歸桂枝清霧兮



濕羅衣奕奕濟濟夜旋玉邸隱隱崇崇朝趨帝宮銀鑪翕  
習烟生霧集絳節繽紛揚光吐文行軒節水去馬騰雲鏘  
鏘翼翼兮馳丹闕超超遙遙兮向紫氛寵極兮慈掌情勤  
兮幽賞戀宸扆兮出入憶幽山兮來往採朱萼兮山之側  
步蘭庭兮候顏色掇綠蘋兮於澗潦宜室家兮叶仇好旣  
而貞心內潔淑則遠傳詼談者聞之而必勸缺薄者聞之  
而凜然況復淮王招隱秦主隨僊弄紫房之琴瑟馳碧落  
之風烟賓屈宋於珠履引鄒枚於玳筵秋葉飛兮散紅樹  
春苔生兮覆綠泉春秋寒暑兮歲榮落林薈沼沚兮日芳

鮮吾君永保南山壽車騎往來千萬年

秋蓮賦

有序

天授元年勅學士楊炯與之問分直於洛城西入閣每雞  
鳴後至羽林仗聞人奏名請龜契佇命拱立于御橋之西  
玉池清泠紅蕖菡萏謬履扁闥自春徂秋見其生視其長  
覩其盛惜其衰得終天年而無夭折者良以隔礙仙禁人  
莫由窺向若生於瀟湘洞庭溱洧淇澳即有吳姬越客鄭  
女衛童芳心未成採擷都盡今委以白露順以涼風榮落  
有期私分畢矣斐然願歌其事久之乃述秋蓮賦焉

若夫西城祕掖北禁仙流見白露之先降悲紅蕖之已秋  
昔之菡萏齊秀芬敷競發君門闕兮九重兵衛儼兮千列  
綠葉青枝緣溝覆池映連旗以搖艷輝長劍兮陸離疏瀍  
兮裂縠交流兮相沃四繞兮丹禁三匝兮承明曉而望之  
若霓裳宛轉朝玉京夕而察之若霞標灼爍散赤城旣如  
秦女艷日兮鳳鳴又如洛妃拾翠兮鴻驚足使瑤草罷色  
芳樹無情複道兮詰曲離宮兮相屬飛閣兮周廬金鋪兮  
璧除君之駕兮旖旎蓮之葉兮扶疎萬乘顧兮駐綵騎六  
宮喜兮停羅裾仰仙遊而德澤縱元覽而神虛豈與夫溪

澗兮沼沚自生兮自死海圻兮江沱萬里兮烟波泛漢女  
遊湘娥佩鳴玉戲清渦中流欲渡兮木蘭楫幽泉一曲兮  
採蓮歌江南兮峴北汀洲兮不極既有芳兮莎城長無依  
兮水國豈知移植天泉飄香列仙嬌紫臺之月露含玉宇  
之風煙雜葩兮照燭衆彩兮相宣鳥翡翠兮丹青翰樹珊  
瑚兮林碧鮮夫其生也春風晝蕩燦日相煎天桃盡兮穠  
李滅出大堤兮艷欲然夫其謝也秋灰度琯金氣騰天宮  
槐疎兮井桐變搖寒波兮風颯然歸根息艷兮八九月乘  
化無窮兮千萬年越人望兮長已矣鄭女採兮無由緣何

深蒂之能固何穠香之獨全別有待制揚雄悲秋宋玉夏  
之來兮翫早紅秋之暮兮悲餘綠禮盛燕臺人非楚材雲  
霧圖兮蘭爲閣金銀酒兮蓮作杯落英兮徘徊風轉兮衰  
積入黃扉兮灑錦石縈白蘋兮覆綠苔寒暑茫茫兮代謝  
故葉新花兮往來何秋日之可哀託芙蓉以爲媒

爲楊許州讓右羽林將軍表

臣某言伏奉今月二日制書除臣忠武將軍守右羽林將  
軍五色無主如驚葉縣之龍千秋來歸似對遼門之鶴中  
謝臣聞爲官擇人先辟之成務陳力就列古人之用心臣

家本關西衣冠河曲素業將墜莫嗣英靈朱輪載輝謬承  
恩渥未盈一紀連刺九州西涼本六部之樞南荆乃九州  
之會蒲藩關左之重鎮魏郡山東之奧區宣城襟帶於吳  
郊許昌密邇於周室每恥政逾期月乏來暮之歌候易星  
霜無去思之詠隼旗迴復日忝恩榮熊軾往還多慚道路  
出居岳牧負尸祿之譏入計河都待曠官之責不意天私  
俯宥睿獎曲成擢之以心膂之官賜之在爪牙之地非常  
之澤捧戴失圖天衛凝嚴北軍清切風霜劍騎頓元武之  
僊闡龍鳥旌旗環紫微之帝座掌斯嚴祕必屬親賢臣也

何顏敢膺殊寵當今鵷鴻接翼文武周身咸皆實已過名  
位未充量臣內求諸已外愧妨賢若使愚臣苟安於私懷  
聖授不允於清議陶鈞雖廣無路自容懼實由衷讓非飾  
跡伏乞垂收渙汗更授瓌材軍司得人臣謂報國無任傾  
幸媿負之極謹詣朝堂上表陳讓以聞

爲皇甫懷州讓官表

臣某言伏奉今月一日制書除臣使持節懷州諸軍事守  
懷州刺史成命俯臨兢魂自失妨賢不退無德而升恩屢  
錫而知慙祿彌高而轉懼中謝臣聞國經選士有一善而

不遺天爵與能從九徵而可試臣薄遊憲府累踐禮闈衣  
繡無執簡之才起草愧含香之列移官望苑日月其除驂  
駕梁園涓埃莫効剖符南峴旣恧民謠作鎮西河未寬人  
隱二邦爲政撫熊軾而無功八使迴軒同鶴鳴而有薦遂  
乃謬霑東帛猥賜褒揚頓掩前瑕更延今寵山陽大郡河  
內名區桑竹映淇水之西井田雜邛山之北將何以潤通  
京邑化接神州雖勉三載之勤何補一年之借封畿之要  
厯選稱難臣也胡顏敢膺斯寄伏乞再求遺玉更網潛珠  
庶使賢才申共理之心聖主得分憂之地無任叨竊之至



謹詣朝堂奉表陳讓以聞臣所讓人別狀封進

爲田歸道讓殿中監表

臣某言伏奉今月二十二日制除臣殿中監依舊押千騎特降鴻私超加等數足臨鯨壑未偕聞寵之憂首抃黿山豈踰承恩之重臣某中謝臣聞欲成大厦必寄於瓊材將適遠途理歸於駿足未有闕公輸之巧輒事揮斤無良樂之能謬令市骨臣藝術無取名檢莫聞叨承任遇遂階通顯再趨武禁誠恪未聞三入文昌涓埃莫効剖符爲郡山東無勿翦之謠握節和戎北漠有不賓之虜而制書涵育

猥錫褒揚天造曲成更延今授臣知不可清議難容推賢  
讓能列聖之明範量力審分先覺之讜言當今運屬昇平  
朝多俊乂伏乞精求稱職以代不能遂愚臣由衷之詞全  
聖主至公之道授受無失臣免妨賢無任悚懼忝竊之至  
謹詣朝堂奉表陳讓以聞臣所讓人別狀封進謹言

爲梁王武三思妃讓封表

妾言妾聞天與才多地居外戚理乖謙益患在寵盈妾亡  
夫三思頗讀聖賢之書夙知止足之分在先朝錫漢藩之  
社位亞上台陛下流渭陽之思室嬪愛主常恐官高祿厚

福極禍來閨門之談顛覆存戒但以願施塵露之効尚鬱  
山林之遊詎謂吳楚指有寵爲名父子以無辜同枉良以  
崇高取忌退讓未形事雖噬臍言猶在耳妾夫埋黃壤子  
天青春唯知哀訴神明號泣天地妾之殘命稱曰未亡更  
何心顏享茲豐厚況三思久謀謙退人所未知實恐士庶  
遊談是非相半旣未能辨明高義豈復忍貪吝餘資雖則  
伯宗已亡獻誠者聞乎奸盜尚冀默婁宿意見知者因乎  
寡妻今墳土未乾總帷猶設妾所以廢寢忘飧瀝款披誠  
未允前祈更陳後請伏願俯矜賤妾遠念幽魂收彼白茅

之封表其赤松之節光陛下有任賢之德明三思無冒寵之譏妾之區區意盡於此無任感切之至謹遣某詣朝堂上表以聞再黷威嚴伏深戰越妾死罪謹言

爲定王武攸暨請降王位表

臣攸暨言臣聞力微任重無德者履之必危功薄賞隆有識者陋其非據臣地因外戚器實中庸顧慙蓬艾之姿謬忝葭莩之末則天大聖皇后敦睦九族崇念六姻曲申猶子之情爰垂降主之澤禮優築館恩洽錫珪拔自堂姪之流光以親王之位臣嘗再瀝誠懇已蒙賜等諸昆今陛下

龍德嗣興鴻基紹復羣萬物而改旦宅千齡而配永洛識  
河圖允叶純深之義雲行雨施載流寬大之恩追奉先慈  
將覃後命外家諸子降等猶誓於山河主第增榮在臣更  
超於等數陛下雖渭陽情重沁水恩多凡是封冊王公終  
須憲章堯舜以濯龍之戚今乃方於五侯緣駙馬之姻古  
未封於四履私親越禮聖人之孝理載光冒寵延災微臣  
之官謗斯久又以班參禁內秩比侍中自非德邁應璩識  
侔慶忌將何以對揚顧問規獻文章況臣位以恩升寵非  
才進無脛而至凡姿簞於珠玉無翼而飛睿澤借其毛羽

未貽身譴幸庇容光臣亡兄攸寧循榮增懼以臣叨鳬繹之貴日夕魂兢負鼇抃之恩歲時力盡屬續之夕再受懇言憂臣愚蒙令臣退讓倘陛下俯遂勤請照察冥心納臣揆分之言置臣獲全之地去茲王號降以公名爰食封邑同諸兄弟賜改散職即望參朝實冀家福惟新朝章咸序天德更逾於造化神理不責於滿盈臣無任懇款覲懼之至

第二表

臣聞富貴者易象謂之崇高滿盈者至人誠其顛覆臣在

非次久冒殊恩所以輟寢思危廢殯懷懼嫌疑之極載陳  
前表備瀝中誠之訴實非外飾之詞而聖鑒未迴寵章仍  
舊戴岳之重何憚力疲阡原之隍日憂身墜臣某中謝臣  
雖學慚敦史而塗聽前言尸位者必會短期冒榮者難爲  
長守豈有外戚尚主異姓封王男皆公侯女食郡縣佩服  
五等輝耀一門湯沐山河家踰萬戶耕夫織婦凡有幾人  
役彼有勞之人供臣無億之用縱蒙聖心垂假其如神理  
不容自先后臨朝攀榮已久聖皇纂極沐澤惟新自古迄  
今如臣流輩苟進者速禍勇退者獲全且王者所以強幹

弱枝爲藩作屏封必李氏無闕漢章伏乞陛下降河渚之  
姻感渭陽之族賜臣軀命永守蒸嘗得同昆季之流望捨  
郡王之號臣以日爲歲以榮爲憂希迴三舍之光允臣萬  
死之請無任覲冒之至

爲東都僧等請留駕表

臣僧某等言臣伏見某日月勅以今月十九日將幸長安  
東都道俗不勝攀戀伏惟應天皇帝陛下重興靈命再造  
黎元域中懷三聖之恩天下識吾君之子關西帝宅渭北  
神臯思切園塋未謁長陵之樹貴爲天子不歷咸陽之宮



宜應萬乘巡遊展鎬池之新慶三秦故老覩漢家之舊儀  
率土喁喁孰不欣躍但以先后神寢夏首方成太子仙墳  
秋中未畢王主倍奉更促工徒雖力以子來而頗妨農事  
倘千官扈輦同費太倉之粟萬國來庭共索長安之米將  
何給用以濟公私且東都有河朔之饒食江淮之利九年  
之儲已積四方之賦攸均誠宜宅幸三川寬徭八水稍登  
稔歲方事歸鑒以欲從人孰不幸甚則天皇后久成佛果  
俯應輪王冀發無邊之巨願光有爲之妙福經始大像年  
簞滋深愧緇流之淨財念蒼生之苦力俯從羣議莫遂聖

情陛下孝感旁通沖襟獨斷追成先志上合天人故得蓮  
礎未施爲停風雨梅梁鬱起若有神明施其力者萬殊莫  
分龍鬼捨其財者千計豈辨人祇岌已千雲程之匪日實  
冀金輿近幸玉輅親臨禮如來之大身畢先聖之遺旨然  
後載詣京輔馳謁山陵即付囑無違情禮兼極無任懇款  
戀慕之至

爲洛下諸僧請法事迎秀禪師表

僧某等言某聞住持真教先憑帝力導誘將來遠屬能者  
伏見月日勅遣使迎玉泉寺僧道秀陛下載宏佛事夢寐

斯人語程指期朝夕詣闕此僧契無生至理傳東山妙法  
開室巖居年過九十形彩日茂宏益愈深兩京學徒羣方  
信士不遠千里同赴五門衣鉢魚頡於草堂菴廬鴈行於  
邱阜雲集霧委虛往實歸隱三楚之窮林繼一佛而揚化  
栖山好遠久在荆南與國有緣今還豫北九江道俗戀之  
如父母三河士女仰之猶山嶽謂宜緇徒野宿法事郊迎  
若使輕來赴都遐邇失望威儀俗尚道秀所忘崇敬異人  
和衆之願倘得焚香以遵法王散花而入道場則四部銜  
恩萬人生喜無任懇款之至謹詣闕奉表請與都城徒衆

將法事往龍門迎道秀以聞輕觸天威伏深戰越

爲文武百寮等請造神武頌碑表

臣某等聞行至公者莫先於發揮茂實垂不朽者不若於刊紀鴻名伏惟應天神聖皇帝陛下德披圖五精乘運先天地而利用依鬼神以制法無思不服有感必通日者變起心膺禍生肘腋弄兵指闕敢忘下濟之恩犯門斬關遂激上靈之憤陛下近幸元武傍顧紫微鳳翔而梟獍失圖龍見而鯨鯢就戮順天翊聖皇后配乾積德從帝居尊佐莫大之英猷參非常之妙畧親紆寶思式頌元猷椒掖

之文久垂河漢甘泉之石已入京都伏惟陛下卑奉聖躬  
謙保神器惜其國用念彼人艱有命且停含靈失望臣等  
容光壽域竊位明朝不蠶而衣無裨塵露不耕而食有負  
靈祇陛下寢有道之豐碑臣等享無功之厚載亭育雖廣  
何所自容且天惠不可以闕書神功不可以久寂臣等請  
各減所俸以勒殊休庶同子來成之匪日無任光開垂裕  
之至

為長安馬明府亡母請邑號狀

臣亡母屬在外戚夙忝末姻不蔭慶雲早先朝露臣髮膚

遺體是亡母所生金紫通班乃聖朝所賜臣每服一輕妙  
嘗一甘鮮何曾不遠媿劬勞近慚榮寵又見同列有太君  
拜邑命婦入朝臣早孤偏不勝感羨母因子貴幸者何多  
祿不及親臣獨含恨明年某月改葬有期私門大事莫逾  
於此臣內寡材術謬忝朝恩外無愆尤夙承母訓郡縣之  
號翻及臣妻哀榮之禮不霑臣母臣生不侍養歿未追榮  
若懼不敢祈恩偷生以安厚祿儻歸泉壤何對慈顏臣死  
罪死罪臣準某年月日制令加一階伏乞迴臣此階追贈  
亡母又臣身死之後合有鼓駕出郊在臣何顏存歿叨僭

亦許臣亡母用臣威儀臣身當以蘧蔭存榮死足所祈越  
禮罪實干誅伏惟陛下孝理寰瀛仁及草木皇室之戚軒  
冕盛於前朝太后之親恩澤踰於曩日臣幸遇非常之主  
敢祈不次之恩伏乞陛下少念葭莩垂哀犬馬回臣休寵  
以慰營魂則今日以前報恩於亡母自茲以後盡命於聖  
朝無任慊懇悲慕之極謹進狀陳請以聞

在桂州與修史學士吳兢書

拙自謀衛降黜炎荒杳尋魑魅之途遠在雕題之國颶風  
搖木饑飂宵鳴毒瘴橫天悲鳶晝落心憑神理實冀生還

關號鬼門常憂死別事未瞑目豈在微身先君業粹中和  
才光文武志道游藝名動京師出谷入朝事多宏益雖崇  
班去已而陰德被人清議所尊何減驃騎恐耆舊咸謝竹  
帛儻遺使盛烈湮沈下情感痛自昔逸羣之器曠俗之才  
譽雖冠于人倫祿不躋于卿士南史之筆漏美不書東岱  
之魂與名俱滅故史遷述許由云不遇青雲之士焉足道  
哉惟君侯禮樂山高文華海濶古一千歲聞聖人之書今  
五百年知作者之運山甫拾遺於中路時謂得賢蔡邕揮  
翰於詞林誰其不許往送家狀蒙啟至公之恩希果實言



深蓄自私之感下官久辭榮擢夙慎禍胎內無負於明祇  
外冀申於知己豈謂一人相毀衆口爭喧遂以虛聲乃加  
眞罪賴皇明昭宥腰領賜全空荷再生無階上荅恃子以  
松竹之操期子以金石之堅幸無雷同懸納謗議見危不  
易是所望焉遠識古人之懷敢申窮鳥之請如季布之諾  
乃重於黃金延陵之許竟懸於寶劍生負食花之惠死効  
結草之誠刺血爲書萬不抒一往年恩貸許惠爲看起居  
注實錄江融別錄使不錯漏國史及高明所撰唐史春秋  
等六處並乞逸遺事跡不駢聲塵代業有光實在吾子遠

佇來札以當招魂秋冬凝寒惟動履休勝青簡時至願想  
窮愁白雲遙來希訪生死珍重珍重